

## Ekwo, Pọlu deru nọ Táyitọsu

<sup>1</sup> Ekwo-ozí ọwaa shi l'ẹka mbedua, bú Pọlu, bú onye ejeru Nchileke ozi; búkwaruphu onye ishi-ozí Jisọsu Kuráyisutu.

Nchileke fọtaru mu; bya ezia mu tẹ mu mee tẹ ndu ono, ọ fọtaru, wowaru onwẹphe ye iya iya l'ẹka ono kabaa oshihu ike; mu emekwaaphu t'ẹphe maru iphe bú ọkpobe okfu kẹ Nchileke; <sup>2</sup> okfu l'ayi tuko ele ẹnya ndzụ gbururu jeye ono. Ndzụ gbururu jeye ono bẹ Nchileke, bú onye ẹ-ta adzujedu ejo-ire kfuhaodururu lẹ ya a-nụ ayi; tẹmanu bẹ mgboko dúbederu. <sup>3</sup> Yo be teke gbalẹru nụ; Nchileke, bú Onye Ndzọta ayi emee t'e shi l'ozí-ọma iya; maru ndzụ ono, o kweru ụkwa iya ono. Ozi-ọma iya ono b'o woru ye mu l'ẹka; tẹ mu tọwashiaru iya ndiphe t'o doo ẹphe ẹnya.

<sup>4</sup> Mu ede ẹkwo-wa anụ ngu nggube Táyitọsu, bú ọgbodo nwa mu; okfu l'i kwetaru ẹge mu kwetaru: l'ọo Jisọsu bú Nnajiufu.

Tẹ Nchileke, bú Nna; mẹ Kuráyisutu Jisọsu, bú Onye Ndzọta ayi meeru ngu eze-iphe-ọma; mekwaaphu t'ẹhu dọ ngu agu.

### *Ozi Táyitọsu lẹ Kirítu*

<sup>5</sup> Iphe kparu iphe mu haru ngu lẹ Kirítu bú t'i mefufu iphe phọduru nụ; nggu aguta ndu a-buru ndu ọgurennya chọchi lẹ mkpukpu lẹ mkpukpu ẹge ono, mu kfuhawaru ngu iya ono. <sup>6</sup> Tẹ

ndu, ʒi-gúta búkwaru ndu ẹ-te mejedu iphe aa-ta ẹphe ụta; ndu alụ-gbaa nwanyi nanụ nanụ nwenkinyi. Ẹphe a-buru ndu unwegirima ẹphe wowaru onwẹphe ye Kuráýisutu l'ẹka; ndu ẹ ta amaduru unwegirima ẹphe ẹjo ẹka l'ẹphe eme gaphugaphugaphu; ẹphe ta bú ndu bú 'anụma-anụma. <sup>7</sup> L'onye ishi chọchi búfutajekwa onye ẹ-te emedu iphe aa-ta iya ụta; keshinu ọ bú onye ishi, eleta ozi Nchileke ẹnya. Ọ búfutajekwaphu onye ẹ-ta búdu ọ-chia-o-kele-onwiya; onye obu-ọku; onye angunuka mẹe; onye eme ẹhuka; onye ẹkpiri ogude ụgho eri madzụ uru aduje. <sup>8</sup> Onye ọbu búfutajechia ọ-kwa-ẹbyee; onye yeru obu l'iphe dụ mma; onye nweru ego-munggo; onye doberu ẹka ndoo; onye umere iya ekoshi l'ọ bú onye duru Nchileke iche; buru onye akpadeje onwiya akpade. <sup>9</sup> Ọ búfutaje onye vudoshi ike l'okfu ono, a maru l'ọ gbaru k'ogude ẹka ẹge e ziru iya ẹya ono; k'ọphu ọo-dụ ike gude ozi ọkpobe okfu ono, eezi ezizi ono dụ ndu ọdo ike ọgbodo adùdù; k'ọphu ọo-dụ ike gudeje iya koshi ndu ʒikaru iphe oozi ẹke e jeberu; ụzo akpọ-swehu ẹphe.

<sup>10</sup> L'o nwekwaru igweligwe ndu, bú o-kwefuru-íkè phe; mbụ ndu gude mkpọkoro okfu; mẹ ụgho l'aghota ndu ọdo; ketekete kẹ ndu Ju, byawaru bya aburu ndu kẹ Kuráýisutu. <sup>11</sup> T'a gbọ-bujekwaru okfu ye egbe ndu ono l'onu; kẹ l'ẹphe egudeje ozi iphe, ẹphe ta ge ezidu; agbaghashi ufu ndiphe; ẹge ee-shi t'ẹphe rita uru; mbụ ndu iphere gvuru l'ifu. <sup>12</sup> L'onye lanụ lẹ ndu Kirítu, bú onye ẹphe sụru l'ọ bú onye agbajẹ ẹja sụkwaru: "Lẹ ndu Kirítu shikwa

l'òdungu b̀uleruphu atukporoku; ejo anu-egu-egbudu phe; ndu enyiru, ẹkpiri egbu egbugbu.”  
<sup>13</sup> Iphe ono, nwoke ono kfuru ono aburu ọkpobe okfu. Oo ya bu; bashiaru ẹphe mbà ike; tẹ ekweta, ẹphe kwetaru buru ọkpobe ekweta;  
<sup>14</sup> t'ẹphe ba angabẹhe nchi l'akọ-ife ndu Ju; mẹ l'ekemu, ndu jikaru ọkpobe okfu ono turu l'onwẹphe. <sup>15</sup> Ndu obu guru iphoro l'ifu Nchileke bẹ anọduje edo nsọ. Obenu lẹ ndu merushiru onwẹphe emerushi; mbu ndu ẹ-te kwedu kẹ Kuráýisutu te nwekwa iphe ẹphe edo nsọ. Uche ẹphe ruhuwaru aruhu; ejo iphe ta awahe ẹphe obu. <sup>16</sup> Ẹphe anọduje ekfu l'ẹphe maru Nchileke; obu l'ẹphe egudeje umere ẹphe ekoshi l'ẹphe ta madu iya. Ẹphe bu ndu aakpofu akpofu; ndu ẹ-ta nuduru madzu okfu; bya abukwaruphu 'o-ga-lẹ-mkpa, ẹ-te nwedu iphe du mma, ẹphe duru ike ememe.

## 2

### *Ọkpobe okfu, eezi ezizi*

<sup>1</sup> Obenu; nggubedua l'onwongu: tẹ iphe iizi yẹ l'ọkpuberu okfu ono, eezi ezizi, anuje ọkpobe ndzu ono dakotakwa. <sup>2</sup> Zia unwoke ndu ọphu ka obu nwogurennya t'iphe ẹphe eme dojekwaa ẹphe enya. T'ẹphe meje umere, koshiru l'ọ gbaru t'e yejeru ẹphe ugvu; ẹphe akpadeje onwẹphe akpade. T'ekwekwe, ẹphe kweru kẹ Kuráýisutu; mẹ n-yemobu ẹphe; mẹ ọta-nshi ẹphe buru ọkpobe iya. <sup>3</sup> Nggú ekfukwaruphu unwanyi ndu ọphu ka obu nwogurennya t'ẹphe meje umere, ekoshi lẹ Nchileke duru ẹphe lẹ nsọ. T'ẹphe ba asujekwa asu; ẹphe ta bu ndu anguruma.

Iphe, ephe e-mejechia bu t'ephe gbe zije iphe du mma. <sup>4</sup> Oo ya bu k'opu ephe e-shi ege ono; zua unwanyi ndu opu bukwadu unwanyi ogbanga t'ephe yejeru nji ephe; me egirima ephe obu. <sup>5</sup> Ephe eshikwaphu ege ono; zua ephe t'ephe nweru egomunggo; dobe onwephe ogà; kwakobeje ulo ephe; buru ndu obu-oma; lanuru nji ephe okfu; t'e shi ege ono t'e b'e gude okfu ehu ephe mee okfu Nchileke iphe-mmanu.

<sup>6</sup> O kwaphu ege ono be ii-kfuru unwu-okorobyia t'ephe kpadeje onwephe. <sup>7</sup> Mee onwongu; k'opu ii-buru onye ee-letaje enya; l'ome umere oma. Teke iizi iphe; nggu agbanwujee ifu; gude ire-lanu zije iya ogbodo ezizi. <sup>8</sup> Kfuje okfu, nweru ishi; mbu okfu, e ta avochadu avocha; nggu eshi ege ono mee ndu okfu ngu iphe-iphere; k'opu ephe ta amadu ejo iphe ephe e-gude ekfurushi ayi.

<sup>9</sup> Kfujeru ndu opu bu ohu t'ephe nujeru ndu gbaru ephe nu okfu; t'iphe bu iphe ephe eme ememe bujeru iphe a-du nnajiufu ephe mma l'okpoma. T'ephe ba agbajekwa ephe okfu; <sup>10</sup> ephe te emeje eka-ntubu. O bu t'ephe koshijechia l'ephe bu ndu gbaru t'e gude ire ephe eka ogbodo egude l'iphemiphe obule. Oo ya bu k'opu ee-shi l'umere ephe l'o ha; melia iphe ezi ezizi ke Nchileke, bu Onye Ndzota ayi ono.

<sup>11</sup> Le Nchileke koshiakwaru eze-iphe-oma iya; bu iya bu eze-iphe-oma, o du iya t'o gude dzota onyemonye obule. <sup>12</sup> Eze-iphe-oma ono be ezi ayi ege ayi e-shi haa onodu ndzu, ugvu Nchileke ta nodu; me ege ayi e-shi nahu egu ejo iphe ke

mgboko. Eze-iphe-oma ono ezikwaphu ayi ege ayi e-shije kpade onwayi; buru ndu doberu eka ndoo; yejeru Nchileke ugvu le mgboko-a. <sup>13</sup> Ayi nookwa kwaberu mboku ehu-otso-ena ono, bu iya bu iphe ono, ayi ele enya iya ono. O bu mboku ono e-koshi odu-biribiri ke Okaribe, bu Nchileke ono, bu Onye Ndzota ayi ono; bu iya bu Jisosu Kuráiyisutu. <sup>14</sup> O bu Jisosu Kuráiyisutu ono be bu onye woru onwiya chiaru Nchileke eja l'okfu eka ayi; k'ophu oo-shi ege ono gbata ayi l'eka iphe du eji; me t'o sachaa obu ayi t'ayi buru ndu nk'iya; mee ayi ndibe iya; t'ayi buru ndu ome iphe du mma a-noduje anma ehu anmanma.

<sup>15</sup> Tuko iphe ono kfushia; nggu egude iya kasaa madzu enu-nchi; nggu egudekwa iya phu koshije madzu eke o mesweru; t'i dulata iya azu. T'e b'o dukwa onye e-me ngu l'e to nwedu iphe i bu.

### 3

#### *Umere, gbaru ndu ke Kuráiyisutu*

<sup>1</sup> Nyatajeru epe t'epe noduje ndu ishi, achi nu; me ndu ekfu iphe eme nu l'eka. Epe anujeru epe okfu; buru ndu kwakoberu onwephe k'oje iphe bu ozi, buhuru esa. <sup>2</sup> T'e b'o nwekwa onye epe e-kfujeru ejo okfu; epe ta swoje uswo. T'epe gbe buchiaru ndu obu-oma; l'emere onyemonye obule odoo. <sup>3</sup> L'ayibedua l'onwayi nwekwaru teke ayi shi buru ndu eswe; ndu e-te nwedu onye epe anuru okfu; ndu e dusweru uzo ke Kuráiyisutu; ndu shi buru ohu egu ejo iphe anoduje agugbaa madzu; me ohu ekpiri iphe dugbaa iche iche. Iphe ayi shi

eshibeje ite iya mbọku-mbọku abụleruphu ẹjọ ọriri; mę ogvu ẹnya-kfukurufuru. Ayi shi bụru ndu dọ ndu ọdo ashị; madzọ ibe ayi adukwaphu ayi ashị. <sup>4</sup> Ọbe ọ bya ebe teke Nchileke, bụ Onye Ndzọta ayi koshiru ayi obu-ọma iya mę ẹge o yeberu ayi obu; <sup>5</sup> yọ dzọta ayi. Adzọta ono ta bukwa l'ọo iphe ayi metaru l'ọma; ọ bụlephu imiko, ọophuru ayi. Adzọta ono shi l'asasa, ọ saru obu ayi; tẹ Ume-dụ-Nsọ mee ayi t'ayi bụru ndu a mụru ọdo; mekwaaphu ndzọ ayi t'ọ bụru ndzọ ọphungu. <sup>6</sup> Nchileke shi l'ẹka Jisọsu Kuráýisutu, bụ Onye Ndzọta ayi; kwatakpọ nọ ayi Ume-dụ-Nsọ ono nshinu nshinu; <sup>7</sup> t'ayi bụru ndu o gude eze-iphe-ọma nk'ia gụa lẹ ndu doberu ẹka ndoo l'ifu iya; mę ndu e-nweru ọkẹ lẹ ndzọ gbururu jeye, bụ iphe ayi ele ẹnya iya. <sup>8</sup> Okfu-a bụ okfu, e gude ẹka.

Iphe mu eme tẹ mu karu ngu bụ t'i kfuaya; kfushia ya ike; k'ọphu ndu ọphu wowaru onwẹphe ye Nchileke l'ẹka e-yeru ẹhu l'ome iphe dọ mma. Iphe-a bukota iphe buhuru ẹsa ọkpobe ebuhu; bya abukwaruphu iphe ákwọ madzọ lẹ mkpa. <sup>9</sup> Obenu l'agha: zelaaru ntutego, ẹ-te nwedu ishi. Zelaaru ọtu ẹgo ndzekfu-ndzekfu ẹpha, shi lẹ ndiche; mę ọswo-phe uswo; jeye mę ọba-phe mbà k'iphe shi l'ekemu. Egbe ntutego ono bukota iphe ẹ-te nwedu iphe ọ bụ; to nwe iphe eerita iya. <sup>10</sup> Tẹ nggu l'onye ebukataje ndu ọphu oo-bukata lẹ chọchi be nwekwa iphe nggu l'ia e-megbakwadu m'ị -nmawaru iya ọkwa iya ugbo lanu; gaa lẹ k'ẹbo; to kwe. <sup>11</sup> Makwaru l'egbe onye ono gbajohuakwaru

agbajọhu. Oomewa iphe dụ ẹji; makwarua l'ime obu iya ẹ ya buwa onye ikpe nmaru.

*Ekele mkpo-chi ishi iya*

<sup>12</sup> Mu -zilephu Átemasu; m'ọ bu Tíkikọsu t'ọ bya; keshikwaa ẹhu; byakfuta mu ẹ Nikópolisu ẹgwegwa; l'ọ kwa l'ẹke ono; ẹ mu tuburu ẹ mu a-nọ l'oge winta-wa, aabya abahu-wa.

<sup>13</sup> Keshikwaa ẹhu yeru Zínasu, bu onye ọya; mẹ Apólosu ẹka; t'ẹphe tųgbua ije ẹphe. Nụkwa ẹphe iphe bu iphe mkpa iya duru ẹphe; t'ẹ b'o nwe iphe ọko iya a-duru ẹphe. <sup>14</sup> Mee unwunna ayi t'ẹphe mụta oje ozi, dụ mma; k'ọphu ee-shije iya dzọ madzụ ẹ mkpa, kparu iya nụ. Ẹphe 'emedu iya ẹge ono; t'ẹphe makwaru l'ozi ẹphe ọbu te nwekwa iphe ọ bu.

<sup>15</sup> Iphe bu ndu mu l'ẹphe nọ l'ẹke-a ekele ngu. Kelekota ndu yeru ayi obu, bu ndu ayi l'ẹphe tųko kwetakota kẹ Nnajiufu.

Tẹ Nchileke meeru unu eze-iphe-oma l'unu ha.

**Bayiburu Ikwo**  
**Ikwo: Bayiburu Ikwo Bible**

copyright © 2014 Wycliffe Bible Translators, Inc.

Language: (Ikwo)

Contributor: Wycliffe Bible Translators, Inc.

All rights reserved.

2020-11-18

---

PDF generated using Haiola and XeLaTeX on 21 Feb 2024 from source  
files dated 29 Jan 2022

3867ef4e-3384-5ab4-a937-63476bb8a7bb